

MEYRICK (MERRICK) (TEULU), Hascard, Fleet, a Bush (Sir Benfro), a Wigmore (sir Worcester).

Y mae cangen Sir Benfro o deulu [Meyrick](#), Bodorgan, sir Fôn, yn cychwyn gyda phriodas Rowland Meyrick, esgob Bangor, a Catherine, merch Owen Barrett, Gelliswic, Sir Benfro.

Galwyd eu mab hynaf hwynt, Syr GELLY (GILLY, GILLIES, neu GUILLIAM) MEYRICK (1556? - 1601), ar enw stad ei fam. Pan fu farw ei dad (yr oedd y mab tua 9 oed ar y pryd) fe'i hanfonwyd ef i'w ddwyn i fyny ar faenol ei fam, Hascard, gerllaw Lamphey; yno aeth i wasnaethu [Syr George Devereux](#). O tua'r flwyddyn 1583 bu yn yr Iseldiroedd, yn gwasnaethu'r [ail iarll Essex](#), nai ei noddwr, yn Flushing yn 1585, ac wedi hynny ym myddin Leicester. Wedi dychwelyd daeth yn stiward teulu i [Essex](#) (c. 1587), a bu'n cynrychioli sir Gaerfyrddin yn Senedd 1588. Dilynodd [Essex](#) i Portugal (1589) a Normandi (1591), a phan fu farw ei berthynas [Syr Roger Williams](#) yn 1595 - g r deheulaw [Essex](#) hyd hynny - daeth yntau'n r mwyaf ei awdurdod gyda'r iarll; yr oedd ei deyrngarwch yn ddiahebol, ac ar gais [Essex](#) rhoes y frenhines iddo diroedd eang - yn eu plith yr oedd castell Wigmore, a ddaeth yn bennaf cartref iddo. Gwnaeth [Essex](#) ef yn farchog (o dan yr enw Syr William neu Gellian) yn ystod y cyrch i Cadiz (1596); yn 1597 aeth gyda'i arglwydd i'r Azores a bu'n eistedd (dros Sir Gaerfyrddin, y mae'n debyg) yn y Senedd, lle yr oedd erbyn hyn wedi dyfod i gryn bwysigrwydd. Yr ymgyrch olaf y bu ynddi oedd gydag [Essex](#) yn Iwerddon (1599-1600). Ar ôl colli ffafr am gyfnod byr (Gorffennaf 1600), cafodd ei ddefnyddio, ym mis Ionawr 1601, i gasglu ynghyd, i blaid yr iarll, ddilynwyd [Devereux](#) yn Ne Cymru, y milwyr cleddyfau a fu'n gwasnaethu gydag ef dros y môr, a'i w r a'i berthnasau ef ei hun yn swydd Faesyfed (lle yr oedd wedi priodi, c. 1584, merch Ieuan Lewis, Gladestry, gweddw John Gwynn, Llanelwedd, a ddaeth â'r ddwy stad hyn iddo), ac yn Sir Gaerfyrddin (lle yr oedd ei ferch, Margaret, yn wraig [Syr John Vaughan](#), Golden Grove, iarll 1af Carbery yn ddiweddarach), a'i frawd Francis hefyd. Yr oedd yn gyfrifol am drefnu llety i ddilynwyd yr iarll yn Llundain, am 'lwggr-wobrwyo' chwaraewyr theatr y Globe i chwarae Richard the Second ar fin y gwrthryfel (6 Chwefror), ac am amddiffyn Essex House (8 Chwefror) yn erbyn lluoedd y Llywodraeth. Ar 13 Mawrth 1601 cafodd ei ddiennyddio am deyrnfradwriaeth. Ailfreiniwyd ei fab Roland Meyrick a'i ferch, yr [arglwyddes Vaughan](#), o ran gwaed ac enw, gan Iago I (24 Mai 1606).

Yr oedd Syr FRANCIS MEYRICK (marchog, 5 Awst 1599; bu farw 29 Gorffennaf 1660), Fleet, Monkton, brawd iau Syr Gelly, gydag ef yn Iwerddon (yn ben ar y lluoedd a ddaethai o orllewin Cymru); cymerodd hefyd ran fechan yng ngwrthryfel [Essex](#) eithr cafodd ddianc rhag cosb. Gwnaethpwyd trydydd mab Syr Francis sef Syr JOHN MEYRICK (bu farw 1659), milwr, yn farchog yn 1614 (13 Mehefin), aeth gyda'r [3ydd iarll Essex](#) i Fflandrys yn 1620, a bu'n ymladd yn ddiweddarach yn yr Iseldiroedd (1624), yn Sbaen (1625), o dan Gustavus Adolphus yn rhyfel 1618-48, lle y clwyfyd ef ger Maastricht (17 Awst 1632). Bu'n eistedd dros Newcastle-under-Lyme yn y Senedd Fer a'r Senedd Faith, lle y buwyd yn gofyn ei farn ar faterion milwrol yn fynych. Bu'n bennaeth ar gatrawd yn y 'Bishops' Wars,' 1639-40 (lle yr oedd ei frawd GELLY MEYRICK, a wnaethpwyd yn farchog - Syr Gillan - ar 26 Mawrth 1639, yn 'ensign'), a chymeradwywyd ef gan D 'r Cyffredin i fod yn swyddog yn Iwerddon cyn gynted ag y torrodd y cythrwfl Gwyddelig allan ym mis Hydref, 1641. Yn ystod y Rhyfel Cartrefol daeth yn 'adjutant-general' ym myddin [Essex](#) ac wedi hynny'n gadfridog gynnuau mawr; bu hefyd yn gomisiynwr trethi, etc., dros Sir Benfro yn 1647. Eithr nid oedd yn cydweld â dienyddio'r brenin, ac ymddeolodd o fywyd cyhoeddus yn ystod yr 'Interregnum' a bu farw yn 1659. Y mae'r darlun mewn olew ohono yn Bush, cartref ei ddisgynyddion hyd 1837, yn awr yn Slebech. Bu dau o'i yrion mewn swyddi yngl n â'r gyfraith yng Ngogledd Cymru : bu JOHN MEYRICK, Bush (ganwyd 1674; cafodd ei addysg yng Ngholeg Iesu, a'r Middle Temple), yn cynrychioli Penfro (1702-8) ac Aberteifi (1710-2) yn y Senedd, a daeth yn is-farnwr cylchdaith Môn (1712-4), a bu FRANCIS MEYRICK yn 'Registrar' Gogledd Cymru. Y mae'r teulu yn parhau i wasnaethu yn Sir Benfro.

Awdur

Yr Athro Emeritus Arthur Herbert Dodd, (1891 - 1975)

Ffynonellau

Oxford Dictionary of National Biography

J. E. Griffith, *Pedigrees of Anglesey and Carnarvonshire Families* (1914), 126-7

D. Mathew, *The Celtic Peoples and Renaissance Europe. A study of the Celtic and Spanish influences on Elizabethan history* (1933), penodau xviii a xxi

Reports of the Historical Manuscripts Commission, 3rd R., 498, 4th R., 336, 5th R., 362-3, Rutland, i. 367-70, Cecil, iv, 340, vi-ix, xi, xiii, xiv

Rushworth, *Historical Collections of Private Passages of State* (1721), iii, 1241 ff.

The Journals of the House of Lords, i, 445

W. A. Shaw, *Knights of England* (1906), ii, 57, 93, 154, 206

W. R. Williams, *The history of the Great Sessions in Wales, 1542-1830, together with the lives of the Welsh judges* (Brecknock

1899), 113

Trafodion Anrhydeddus Gymdeithas y Cymmrodorion, 1946-7, 77, 84

Cylchgrawn Llyfrgell Genedlaethol Cymru, vi, 190-1

Firth a Rait, *Acts and Ordinances of the Interregnum, 1642-1660* (London 1911), i, 290

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

